

四庫全書

集部

欽定四庫全書

集部
曝書亭集卷
十至
十二

詳校官庶吉士臣汪彥博

助教臣常循覆勘

總校官降調編修臣倉聖脉

校對官檢討臣盧遂

謄錄監生臣呂永安

欽定四庫全書

曝書亭集卷十

翰林院檢討朱彝尊撰

古今詩九

柔兆執徐

讀葉司城封嵩游草賦贈

客居通路春復冬有如飢鳥仍投籠平生夢寐在五岳
垂老未覩嵩陽峯峯頭玉女定笑我那不控鶴鞭癡龍

瓊漿勿飲良可惜白髮滿鏡徒愁容
葉君昔年宰登封
莓苔洗字尋石涼霞梯高高八千丈
筍屨踏遍青芙蓉
廬巖瀑飛一疋布鐵梁峽偃千年松
仙人十六時相逢
閒吹鶯管向明月有時髻插三花襪
漸川俞叟與君往
來熟言君愛竒恒未足開筵為蒸玉
面狸行藥曾騎雪
色鹿測景還登測景臺
逍遙宛在逍遙谷
偶然長嘯百里聞
每遇殘碑三日讀
不見囊中金石編
何殊集古歐陽錄
崇文門西車轂擊十里黃塵
眯人目下馬尋君道

名姓一笑情親為鄉曲投我嵩陽詠百篇勝聽哀絲與
豪竹近來海內工詩格新城王君最雄獨一見君詩許
絕倫同調由來賞心速君今司城名藉甚粟果少年齊
足跼入門廳事半栽花插架圖書尚連屋作吏如君良
不俗閒從巷北期王君更許高齋醉醺醪金箱圖書恣
卧遊豈必盧鴻草堂宿

春暮何少卿招同故鄉諸子集古藤花下送譚

十一孝廉兄之舒州

古藤二本高刺檐毳毫亂挂驪龍髯主人築堂二十載
客到盡卷堂中簾肥香徐來翠陰動晴絲欲墮朱光炎
今年經過物候早三月已見繁花黏河豚未罷直沽市
牡丹定綠房山尖春風不飲最可惜急收筆架移書籤
相期鄉黨十數子同時走送譚孝廉一觴一詠少長集
脫畧禮法無纖嫌懸燈直教猛燭並有酒但向深杯添
移時留髡盡送客三人密坐清宵嚴北城漏鼓聽漸數
下弦殘月光磨鎌捉卧窀人選新格主猶鯨吸賓魚噉

人生離多合亦易有淚肯對花前沾舒州地勝山水兼
孤城皖口跳波漸芙蓉之池泛水日訟庭無事恒虛恬
鱖魚凝脂切黃玉翠螺如畫圍蒼兼乃知下第去亦得
絕勝六街衣馬塵容黔

題元張子正林亭秋曉圖同高層雲賦

一峰畫品最緻密逾三百載流傳稀今人摹仿目未睹
但取率畧屏紆威殘山剩水不數點豈惟神異貌亦非
當時藝事許入室華亭張中稱庶幾即如此圖乃學井

西王生筆林亭曉色開
熹微焜黃老綠下掩百竿竹是
誰竹下結屋闕荆扉橋無一人行
樹無一鳥飛斜川折溜凡幾轉
古寺窅兀樓松圍涼雲濛濛不可
極懸泉直下春林霏人家磧歷更
高處水榭八九相因依武陵桃花
笑卑濕茲山避地堪茹薇當知作
者意獨得能使留題數子傳聲徽
客中三伏正苦熱對此羽扇都停
揮安得天風扶我縹緲度絕磴與
君攜手同振千仞岡頭衣

贈鄭蓋

金陵鄭簠隱作醫八分入妙堪吾師竭來賣藥長安市
諸公衮衮多莫知伊余聞名二十載今始邂逅嗟何遲
自從鴻都石經後工者疎密無定姿任城學官闕里廟
羅列不少漢人碑簠也幽尋遍摹搨義娥星宿撫無遺
郃陽酸棗法尤備心之所慕手輒追黃初以來尚行草
此道不絕真如絲開元君臣雖具體邊幅漸整趨肥癡
寥寥知解八百襍盡失古法成今斯邇來孟津數王鐸
流傳恨少無人披太原傳山最竒崛魚頑鷹跼勢不羈

臨清周之恒委曲也得宜勾吳顧苓粵譚漢暨歙程邃
名相持未若簾也下筆兼經竒絲如烟雲飛欲去屹如
柱礎立不移或如鳥驚墮羽翮或如龍怒撐之而箕張
昂萃各異狀屏幃大小從所施平山堂成蜀岡湧百里
照耀連雲嶽工師斲扁一丈六衆賓歎息相矐眙須臾
望見簾來至井水一斗研隃糜由來能事在獨得筆縱
字大隨手為觀者但妒不敢訾五加皮酒浮千鴟我聞
此事足快意目雖未覩心已怡安得留之數晨夕醉時

竊拊醒肩隨盧溝橋北風已厲子今南去生凌澌驪駒
在路留未得歲聿其暮云誰思鍾山草堂定好在放溜
且任吳中兒華陽瘞鶴字刻露鄧尉遺樹花參差無錫
城邊見嚴四示我長歌一和之

送顧瀛之沂州

官亭把袂惜離居南指臨沂歲未除行過蒙陰山葉響
馬頭青壤雪消初

壽何少卿元英

冷卿宴客已無錢，猶有南牀許醉眠。
清鏡看來容四十，練裙書秃管三千。
日邊初度春尤近，雪後今宵月最圓。
弟子麴車來不少，相留判飲到新年。

壽劉編修芳詰二首

金錢衮衮考堂輸，今日通階昨日殊。
誰似編修甘寂寞，七年不見集賢趨。

人日梅花一月前，騷人初度棗弧懸。
蕭然賦就攜羣從，絕勝徵歌玳瑁筵。

強圍大荒落

河豚歌

天津之水連北溟七十二沽漩迴汀漁師乘春漾極浦
舳舻葉葉輕於萍河豚此時舉網得活東小大同賦形
賣不直錢棄可惜堆置更比凡魚腥南人見之莞爾笑
是物足勝通侯鯖葦蒲束取十百輩馬馱車載兼手拎
晨興主人食指動忽覩兩縛陳吾庭客來疾呼莫莫莫
亟當投畀煩丁寧食熊者肥食鼃瘦豆令人重榆則瞑

彼猶無傷此獨甚犯之不異衝鈴釘主人語客且安坐
吾言物理君試聽人生一死各有候韭英棗華木葉零
即如飲啄亦分定鼎腹豈必堅關扃雖云甘脆腐腸藥
不聞茹藿長延齡茲魚信毒種乃別媵胸有法食有經
或如燕子尾涎涎或如束帶腰黃鞞今之饋者皆不爾
安用荷插薶邱冥抉精刮膜漉出血如鼈去醜魚乙丁
磨刀霍霍切作片井華水沃雙銅餅薑芽調辛椒攬酢
荻筍抽白萋蒿青日長風和竈觚淨纖塵不到晴牕櫺

重羅之麪生醬和凝視滓汁仍清冷吾生年命匪在卯
奚為舌縮箸蠲停西施乳滑恣教齧索郎酒釀未願醒
入脣美味縱快意累客坐久心方寧起看牆東杏花放
橫參七點昏中星

送董孝廉愷游五臺

軍都關外朔雲屯過盡龍堆入鴈門一路金光瑤草色
青天直上五峯尊

兕觥歌

觥為許文穆公餞趙太史定宇物為何少卿賦

覆玉盃屏香螺徹銀鑿落金叵羅黃支之犀塵盡辟主人持觥客前席請看觥上銘為君陳夙昔定陵冲年資相臣元老奪情衆怒嗔朝陽一鳳午門伏折檻寧辭逆鱗觸歸時餞者滿都亭珍重臨岐許文穆神羊一角詎有雙流傳既久歸婁江張公以之遺弟子敢諫吾公趙公似更兼愛客無倦容平原十日恒過從朝衣典畫且不顧快意但寫鳧花濃我浮此觥亦已數尊前豈惜狂歌重吾公邇年徙卿寺西掖南牀誰鶚視漢殿今無白

獸尊滿飲黃流莫輕寘

周郎中自閩回賦贈二首

萬里孤臣去三年別館囚遙憐天北望不異海西頭曲
罷紅萼老園荒紫萼秋空堂今夜燭誰分話離愁

入夜羝同宿經秋鴈不飛歸迎雙眼淚去陷幾重圍攬
鏡顏都改趨庭計已非辛勤完節意冬月尚絺衣

同里李符游於滇遇碧雞山道士謂曰子前身

廬山行脚僧也後十年當仍歸廬山符乃畫廬

山行脚圖俾子題詩二首

畫裏分明廬岳僧雲峰有約十年登江湖到處勾留住
者爾入山能不能

桃鄉一望水按藍擬結鄰居共釣潭休信碧雞狂道士
閒拋老屋在花南

春浮閣

春浮本佛樹之子愛逃禪小閣道南市清流牖口泉攤
書官柳近對酒女牆偏盡笑張思曼能牽岸上船

題董尚書墨蹟

三真六草董尚書北米東邢總不如試誦容臺好詩句
一縑肯換百碑礫

彭城道中詠古二首

舊社粉榆改寒雲芒碭收山風吹野火飛渡斬蛇溝
博浪飛椎後圮橋進履年無人知偶語況有素書傳

清流關

清流關屢屢設險古來尚細路綠秋毫石角竦殊狀舍

我一兩車拄此九節杖初行井臼中俄出松果上回睇
衆山卑連峰走頽浪入關少礮礮客意始蕭放平岡響
楓葉斷壁偃花當南滌暑未銷西澗水新漲眺遠懷昔
人儒衣謁戎帳君臣既深契一言判興喪偏師越死地
於此蹶上將遺跡雖已湮過者心所嚮山高而水清獨
立但怙悵

題顧夫人畫蘭

眉樓人去筆牀空往事西州說謝公猶有秦淮芳草色

輕紈勻染夕陽紅

蘭名見金漳趙氏譜

著雍敦牂

鄭州題壁

積水漁村渡新涼酒旆風河間多姹女若箇數錢工

得龔

百朋

嶺南書却寄

別鴈橫汾信去留何時漂轉入端州天邊消息初踰嶺
戰後江山獨上樓草檄硯開鷓鴣潤歸帆雲暝鷓鴣愁
回憐十載相逢地晉府街東並馬遊

為徐徵士題畫

買斷西濛港湖田二頃餘應同尹都尉暇便著農書

王尚書招同陸

元輔 鄧漢儀 毛奇齡 陳維崧周

之道李

良年

諸徵士讌集怡園周覽亭閣之勝

率賦六首

北斗依城近南陔選地偏綠衣逢暇日珠履託羣賢山
攤牆初亞林疎徑屢穿身隨沙際鶴飲啄到平泉

石自吳人壘梯懸漢棧牢白榆星歷歷蒼蘚路高高宛

得棲林趣渾忘步屨勞下山無定所隨意各分曹

澗白泉初徙籬金菊未枯夕曛含略約亂石點樗蒲密
坐千人許迷途八陣俱不因爨烟細何處覓行厨

風磴雙亭外踈藤蔓十尋龍蛇寒自蟄鳥雀暮長吟待
結千花墜應同萬柳深隔林催未起獨坐想濃陰

屨滿西南戶堂臨上下洄落成凡幾日勝引喜先陪監
史新圖格壺觴舊醖醅謝公能睹墅會見捷書來

小閣簷端起虛窗樹杪憑忽驚黃屋近更繞翠微層九

日今年悔諸公逸興能尚書期可再雪後轉須登

題周恭肅公畫牛二首

白川畫龍兼畫牛遠村急雨菰蒲秋百年紙墨黯無色
雲氣溟濛猶未收

牧童橫笛吹不得背面却看溪上山記得濫溪西去路
荻花楓葉淺沙灣

沈烈女詩

吳趨沈氏女許嫁黃小同墨車雖未迎媒妁言已通黃

童抱羸疾十九年命終沈氏得凶問淚落如泉江布總
箭筈墜喪服治衣工上樓不下樓顛顛縣春冬含辛桂
枝蠹食苦蓼葉蟲父母勸之嫁女恚經樓中須臾救復
活自誓永不雙獨居三十年兵革俄乘墉全家盡逃匿
女仍守樓牕結我裳與衣輟彼殮與饗一笑歸黃壚之
死何從容層層虎邱塔下臨松柏桐兩家謀合葬龜筮
咸相從小字書新銘白石沙磨礮雙飛花蝴蝶並蒂生
芙蓉春水鴨頭綠秋草雞冠紅花船恣來往愛泊山西

東吾願游冶女視此馬鬣封

題腰鼓圖

細腰急捧鼓參撾水調兼歌穆護沙料得翻身誇絕技

只嫌插鬢少葵花

邱漢陽壽詩二首

自從江漢擢歸舟雲壑棲遲三十秋占得釣磯臨海宇

至今八十轉風流

圖經七十二福地其二乃在東楚間先生林居盍池近

長年不改芙蓉顏

屠維協洽

元日同孫

枝蔚

毛

奇齡

陳

維崧

吳

雯

汪

楫 諸微

士喬

萊

舍人湯

古曾

上舍集曹

舍人

禾

書齋

遲

李

良年

潘

萊

不至即席

限韻

二首

勝引期元日虛齋東五經客來衣半白杯至眼俱青密
坐更番改清言次第聆燭花高不落嘶騎且迴停

樂極修簫譜觴行罷酒監同聲歌郢曲異味轉吳帆東

閣花須放西山翠可鏡還期共潘李並馬試春衫

古意投高舍人 士奇

奕奕九層臺泠泠五絃琴威鳳刷其羽歌舞樂帝心朝
儀靈沼上夕息高梧陰覽輝千仞餘求友及遐深爰居
本海處亦復辭烟潯東門一戾止游目嘉樹林和風動
閭闔百鳥啾啁吟獨無笙簧舌臆對難為音主人軫物
微飼花若黃金食之非不甘愧莫報以琛寄言鸞鳳侶
釋此歸飛禽

酬閻若璩

烈火燔帝竹秦鏡忽以淪
番番濟南叟後死耄而勤
腹笥傳少女齒落餘空齟
掌故穎川來何由聽其
真所怪張歐陽疑義默不申
金絲魯宮響科斗蟠
輪困俄遭巫蠱發竹簡迹久湮
梅生千載後一一
紛羅陳其餘航頭字摺撫亦有因
譬若完衣裳安
用重補紉文從義艱晦體殊絕
蹤塵孔書既咸在
謨誥恒鮮新何不正今譌去險
歸溫純此義誠難

知疑者頗相循闔生并州彥徙宅清淮濬昨年應詔
至旅食春明春小心對縫掖餘勇刺古人示我一
編書其言狂且醇諸家援王吳百氏搜墨荀幽室
決突與希音辨韶鈞雖為見者駭猶勝徒咕呻吾
生嬾述作老矣潛悲辛君非漢井丹經義何紛綸况
有紉扇詠贈我情彌親客子寓招提不出動盈旬春永
玉河裂草暖波粼粼紅杏舒繁條翠嵐壓重闥相期出
郭游西山恣迴巡並馬騁劇談九皇八伯民醒即坐松

石醉即卧花茵

御試省耕詩二十韻

長樂蚪鐘啟端門羽杖排良辰元已近暄景暮春佳
帝念勤民切羣情望幸皆蘋風吹近遠蘭澤洗氛霾銜
尾中流鷁拳毛內廐駟農與沾雨露俞騎束鞞鞞沙柳
津亭岸山松驛路牌西疇一以望東作此時偕于耜分
原上提筐盃水涯杏花殷似火葛葉小於釵巷靜錫簫
市煙澄土銚柴倉庾飛習習布穀語喑喑樂事紆

乾顧豐年協

睿懷歌時成夏諺行處即堯階
帳殿開黃屋人家遠翠
厓定知先稼穡力為減徭
差吉日宣王禱空同軒后齋
星躔齊北拱聲教已南諧
曲渚宜浮洛芳尊迴勝淮
宸游多悅豫振旅入天街

送張大理

雲翼

省親臯蘭結婚作

纔投縞紵慰臨歧別酒翻慳雪
後持聽棘暫辭歸覲日
絃桐為譜述昏詩咸陽紫鳳
秦臺迴京兆青螺漢殿知

此去心懸清禁月重逢應及柳如絲

為姜宸英題畫

潞水秋風上短槎日湖南望水雲賒空教

天子知名字不賦長楊賦白華

送施鹽范令什邡

早縮銅章去嚴程莫滯留連雲仍舊棧到日恰高秋訟
向泉邊聽書從鳥外郵毋嫌山郭小漢將此封侯

寄酬張五處士兄彥之

五茸多富室，筭緡苦煩拏。兄也雖屢空，家居能晏如。糠
粃恒不飽，寄詩饒鴈魚。何哉兔園冊，不鈔貨殖書。

和田郎中史移居韻

道南道北書一車，田郎與我齊移家。月俸雖分五斗粟，
相呼野性同麇麇。濁醪盈杯注涑水，暖湯濯足歌彭衙。
風簾無額星炯碎，短牆縱茸仍天斜。牕前喜有兩棗樹，
凝想滿眼他時花。誦子山薑詩句夾有若，暝坐翻金鴉。
盤空硬語和未穩，月黑漏鼓鼙。鼙搥布衾不睡我，亦爾

牽牛獨處嗤媧媧

題李檢討

澄中

所藏明月蘆鴈圖二首

吾家水閣傍江斜
風荻侵簷一丈花
連鴈低飛渾不見
祇聽拍拍響圓沙

遠岸風微宿雨殘
天邊忽湧爛銀盤
盧河橋畔秋容好
比似南湖一曲看

淨業寺看荷花同嚴四檢討

繩孫

作

香刹綠隄轉官橋
信水流綠雲千萬頃
不見采蓮舟

李檢討

澄中

惠鮮鰻魚賦詩

海岱惟青州水族不可筭有魚其名鰻託命白石研孔
如螺者九體具蚌之半浮沉信潮汐出沒味昏旦漫漫
逐崩濤汨汨臨駭岸漁師三五輩利刃挾新鍛迎寒解
衣禪燎薪雜石炭俄而投衝波若勇士赴難滑苔裹獷
殼自恃兩堅悍彼石陷死地嗟汝豈得竄殺機伺巧發
一割乃中斷黨附安可常徒令見者歎是物昔所珍不
數鵠鴉胖彥回三十枚曾鄙萬錢換李君家諸城古臺

琅玕畔封書敕官奴鄉味來歲晏荒途犯風雪羸馬走
顛汗以之貽故人腥涎尚未澣疑有蠙珠存無復朽索
貫饌法失嚴龜食經忘馬琬庖廚異羹臠南北互譏噴
于馬出新意滓汁藉糟灌雜雜筠筐排一一桂火燉雖
殊馬甲脆足勝羊胃爛觀頤匪自養比鄰呼酒伴饒叔
了陶盤不食真鈍漢

送耿副使之官隴右

雙旌曉發動征塵猶見黃花驛路新樹屏莫辭朱圍遠

封侯須與玉闕鄰
魚龍積水寨
惟近馬鹿晴山繞
暮春到日西堂留牘少
尺書須寄倦游人

佛手柑二首

柰女環初脫
金仙露最甘
萬重來水市
一笑啟筠籃
味豈踰淮變
香仍隔歲含
回思珠海住
千樹嶺雲南
宛是祇林得
宜從漢殿傳
浮江螺女外
置驛橘官先
白截蘊肪嫩
黃堆兔玳圓
尚嫌香氣遠
分傍枕函邊

上章涪灘

平蜀詩十三章并序

臣伏見

皇上即阼以來仁聲溥洽凡在海外重譯來格邇者巴蜀負固叢爾叛寇神人交憤六師所向何堅不摧

皇上先之以德化未即咸劉乃凶渠既殞餘孽罔悛天威赫怒爰命虎臣五道分軍窅入其阻日未浹旬保守成都底定正月丁巳捷書上聞誕集文武臣工宣于闕下僉曰蜀寇之不靖予今六稔

皇上休養民力湛靜不練金鏡在握朗照萬里之遠山川險易瞭若掌中

廟算恢宏指授方畧以師則武以時則利以將相則和調用能不日成功

聖武布昭遠邁隆古臣以布衣被蒙

恩澤拔置史館粵稽曩昔劉闢既擒韓愈進元和聖德詩明之平蜀劉基亦作頌以獻臣雖蒙滯躬逢盛際于以頌揚丕烈其何敢後乃拜手稽首而獻詩曰

皇帝聖哲靡遠勿瞻南誥北變西被東漸蠢爾不庭憑
阻滇黔爰居巴蜀以逞戈鋌

皇帝曰咨元戎是救欲宣武功誕敷文德寇衆來挑我
堅壘壁匪久其師恤民之力

民力既恤士氣孔揚我車我牛我倉我箱芻芡菽粟在
噉在岡萬夫豫附萬馬騰驤

魁渠肆殄臬謀日阻

帝曰可哉命整雲旅分鑣以馳揚旌負羽或搯其吭或

擊其膺

赫赫奮威師度七盤既下葭萌入閭中關桓桓勇略烏
道鈞援繇井既收遂復錦官

如彼東瀛用注螢燭如彼衝風用卷秋籜昧雉斯經窮
獸乃縛徹其幟竿清我堆析

蜀之黃髮植杖以遨蜀之黃口聯臂而謠壺則有漿簞
則有醪或俛于野或迓于郊

迺疆迺理檉林棘路爾宅爾田輕爾徭賦巴貢其牋寶

輸其布棧谷梯山千里褰沂

捷書夜奏徹于

宸聰午門斯啓宣示臣工小大稽首蹈舞攸同庭燎哲
哲光如日中

我出我師正月初吉至于益部曾不旬日矯矯虎臣殆
罕其匹

帝心是嘉首用遷秩

人亦有言師克在和惟此成功

廟筭實多貳者勿族降者勿苛

皇仁之溥四國是吡

井絡既平坤垠式莫蒙詔牂牁載歸赤縣

皇帝神武俾修組練亦有昆池于焉習戰

聖有恒訓儆戒無虞凡百有位職思其居勿謂外寧官
守或渝小臣作詩以贊訏謨

題李檢討梅梅花圖和韻

樂飲高齋勝都亭不易哉客從元夕暇花擬故園開未

雨莓苔潤衝寒雀豹來若為方法便分乞小牕栽

刺梅園餞別陸進游汝陽

刺梅園裏青松樹笑我頻來竟白頭避暑暫辭襜褕客
停杯又起別離愁村煙斷續陽人聚山色東西郊縣樓
餘事機雲時唱和莫忘日下置輕郵

題湯上舍自牧潛籟軒

香草芹城外幽居虎峪隈縑塵吹不到白鳥有時來萬
籟入門寂羣花繞屋開家僮聞剥啄知得異書回

七月晦日 賜藕恭紀二首

宸遊西苑念詞曹踏藕連船出鷺濤白藕金門教遍及

青泥玉井訝新淘欲添素節秋迎閏

是歲閏八月

看漉花磚

日漸高賜果自來聞曲禮不圖 異數小臣叨

分載復與路未賒冰條玉筍淨無瑕蒸來須實麋牙稻

雪後寧論虎掌瓜故事繙書前代少歸田對客異時誇

餘根試傍柯亭種驗取薰風紅白花

送慕主事權關杭州

江漲橋邊路星隨使者來須知持國計端藉軼倫才書
幌晴湖卷茶檣夜火開西谿春信早誰並咏官梅

題吳徵君雯詩卷一首

籍甚吳郎大雅材賦詩不上柏梁臺翻飛却似橫汾鴈
幾度秋風上苑來

送趙主事吉士權闕揚州

珠簾十里江都市鐵鹿連船估客檣持節自來星使重
筭緡須比水衡強橋邊揚子仍開驛柳外平山舊有堂

到及梅花官閣綻好攜賓從促飛觴

贈別梅庚三首

宛陵才子數都官似爾清詩和者難猶記春游潭柘寺
下方點筆到層欄

東田西曲我曾居擬向茅山讀道書此意沈吟三歲久
送君南去轉躊躇

谿山重疊細泉分畫手由來最軼羣輸與田郎團扇好

秋牕看寫敬亭雲

謂學使
更也

奉酬相國馮夫子問病之作

月閏延秋序樽空病酒徒黃楊生易厄烏几凭逾孤夫
子勝龍樹奉錢資藥爐清風蕪有作宛使蟄蟲蘇

送十一叔還里即作豫章之遊二首

沙隄棘樹路依然再到京華四十年客裏鬢絲驚並老
愁中藥裹迭相憐觥籌尚記投賓轄薑蔗都無負郭田
此去南湖仍暫住未容高枕竹林眠

大江西上總風湍猶勝驚沙老據鞍擬共故人登快閣

便浮小艇沂層灘竹雞格磔雲根語蘭草青慈鏡裏看
南道逢迎應不少莫輕留滯等長安

曝書亭集卷十

欽定四庫全書

曝書亭集卷十一

翰林院檢討朱彝尊撰

古今詩十

重光作墨

送陸參議光旭督儲江北兼訊龔方伯佳育金

司臬鎮田學使雯

春盤細菜散觥籌
暇許招尋醉肯留
遲日最難花下別

輕塵却向雨餘收
熟知官閣三山近
預想燈船五月遊
驂竹黃童應笑語
石城岳牧總風流

題李檢討

澄中濯足圖

我昔左海遊
曾為東武客
夕陽一騎人
不知馬耳晴峰
照金碧
夢想青蓮五朶開
雲泉百折流
滌洄當時濯足
若逢爾
筍屨桐帽忘歸來
攜手日上超然臺

夏日 瀛臺侍直紀事六首

暗水三橋出
明星萬戶開
玉堂鈴索動
宣喚入
瀛臺

宿葦多於薺涼沙白似冰隴隴深樹裏忽露九枝燈
麗草雲根潤風花鳥下香蓬萊今始到真在水中央
太液新蓮酌金盤曲宴初

君恩念蠲渴先賜馬相如

螭首濡毫罷蛾眉散直歸爐烟香未歇荷氣復侵衣
紫籞千花露金塘萬柳條牽留容左史徐度赤闌橋

五月丙子侍宴 保和殿恭紀二十四韻

柱下隨周史琴邊聽舜歌

廟謨神策勝荒服遠人過葱嶺車書接條支部落多郵
籤幾重譯貢使百明駝黃帕開封速花靛視日趕九窟
齊脫劍一士許鳴珂乍橐螭頭筆還衣鳳尾羅逶迤綠
幔閣踖踏步鑿坡天半聞

清蹕塵中隔絳河班聯小侯近禮異叔孫苛糶官庖
出葡萄塞馬馱壺冰淘紫苙山葉裹瓊朮割肉容臣朔
傾心到尉佗上雲留麗曲深雍舞蠻韉喜溢

龍顏甚衰慚鶴髮何見知真特達矢報尚蹉跎懷核披

香案分醕太液波自然蠲暘暑直覺去沈疴烟淨高城
柳風傳別殿荷景猶長北至序正秩南訛

帝治原無外

皇居信有那萬方皆屬國六詔敢橫戈洱海兵將洗苴
蘭石可磨宣功宜作頌

聖德邁元和

題王舍人嗣槐西山游記三首

三年索米住長安咫尺雲峰欲上難請罷高文但西笑

開簾試隔女牆看

盧師說法已千霜
石上松猶四尺強
我亦曾尋二龍子
夕陰點筆在莓牆

上方絕磴最嶄巖
花藥春叢靜不芟
六聘山中三日住
輸君秉燭入空嵌

臨淮口號

鮮鯽臨淮美傳聞
尺半強抵供津吏
索不放老夫嘗

秋杪同周芻王暉李符龔翔麟邵瑀舍弟彝玠

從子建子游攝山是夕包銘曹彥樞適至際曉

周覽山曲信宿乃還輦圖為行者子各紀以詩

予得四首

一峰立如繖衆峰韜陰霞有時衆峰露一一青蓮花我
來秋已深白露零蒼葭同調五六人志在窮幽遐出郭
屏嫌從取徑入嵒岬高墳何王墓但有麟辟邪犬吠疎
籬根鳥棲枯樹榭每因青谿曲遂使略約斜山僧遠迎
客拄杖披袈裟坐我青豆房汲泉烹紫茶

檄檄霜葉鳴皎皎霜月白豈期深山中乃有不速客將
無御風行吹落大小翻手持竹如意並坐萬古石舉杯
斟酌之酒戶笑連擘東林鐘魚聲相答永今夕

凌晨取微徑栗杖叩精廬病葉脫鴨脚斜門束林筵秋
盡澗泉涸厓窟徙潛狙谿橋凡屢渡徑草多未除西上
天開巖縱觀石壁書大江流烏下日午風舒舒急漿撐
盧舟有若逆水魚不知躋絕頂蒼茫復何如

山游逾信宿未能極深窈我僕迎路隅搢步出叢篠比

邱指雙松紀年十歲少何人植此樹母乃明僧紹摩挲
捨宅碑風迹尚未杳王郎妙山水能事擅江表試畫偕
游朋烟液信昏曉經營彈意匠改月庶能了

晚登燕子磯同周布衣貴柯舍人崇樸各賦三
韻

舞燕寒不出危磯淨無塵夕陽射亭柱遠渚移釣舫應
從長蘆畔指點登高人

魯太守起席上賦

海內詞流幾派分盡誇皇甫士安文

太守作今
詞選序

正愁縞

帶交期晚蚤有瑤華驛使聞歸路亭皋飛木葉放船薛
澗冷湖雲十年夢寐西堂燭今日題襟得共君

贈徐丈

石帆先生海嶽姿盛年解組棲山茨耕漁軒竹長千个
上下崦梅開幾枝有客問年書亥字閉門轟飲過申時
只今介雅多新句好續金蘭舊日詩

玄默閣茂

送徐中允 秉義 假還崑山六首

紫陌春晴匹馬歸，清江南下一帆飛。
人生半百且適意，未見朝衫勝芟衣。

經義紛綸致異同，誰能閉戶軟塵中。
著書終讓名山好，輸與周南太史公。

舊侶荆高對酒頻，香螺畫榼五冬春。
獨醒客去無堅坐，卧甕憑誰捉醉人。

石湖居士范成大，金粟山人顧阿瑛。
歸向東吳無箇事。

留賓題徧草堂名

爛漫廚烟煮野蔬
松根秋末韭春初
到家一事差堪惜

不食松江巨口魚

中允性
不食魚

綠波碧草望中遙
劉井柯亭轉寂寥
他日歸帆下吳苑
先攜竹杖訪平橋

送張劭之平遙

彼汾沮洳吾舊遊
送爾匹馬逾徐溝
人行芳草碧於水
日出杏花紅滿樓
榼中酒味苦桑落
簾外鳥聲黃栗留

客居適意遠亦得搖筆賦詩何所求

送編修孫卓使安南

詞臣銜

命自螭坳親捧天書出漢郊萬里驂鸞經北戶百夫

騎象迓南交蕉花紅壓枕榔杖蘭葉青連翡翠巢知有
清文冰雪並能令瘴雨洗黃茅

李檢討澄中紺園雜詠六首

荷陂

風過蓮葉香日出釣船去不聞雞犬聲但有鷓鴣語

柳浪

斷岸綠楊齊濃陰覆水低東風吹太急扶起過橋西

綠水軒

軒中獨木几檻外獨木橋際夜沙月明蘆荻風蕭蕭

會心亭

雜卉秋尚開淺莎晴可坐於此獨寤言浮榮等糠莖

鏡香樓

吾里鏡香亭君家鏡香樓滿池鴛鴦浴四面芙蓉秋

松風臺

山月無片雲夜半松風起欲寫入瑤琴風聲吹不已

上巳萬柳堂燕集同諸君和相國馮夫子韻二

首

不到閒園已隔年綠楊高映女牆連無妨並馬橫橋渡
更許深杯曲水傳徑仄易侵蘋葉小日晴况有杏花妍
舞雩幸忝從遊列澹沲春光過禁烟

小徑升堂步履偕隄沙遠築避塵霾歌翻驟雨新荷好
地比崇山峻嶺佳露井有華滋藥甲春衣無桁挂松釵
永和會後斯遊最禊飲蓬池未許儕

送陳四處士晉明再入楚二首

燕山雪後送君行茸帽駝裘馬上輕一片晴川萬楊柳
春風重入武昌城

官清幕府足棲遲漢上題襟定有詩鑿井便為王粲宅
行歌隨處葛疆池

沈詹尹荃崔少詹蔚林招同湯侍讀斌施侍講

閏章潘檢討耒飲限燈字

九月秋陽氣尚蒸晚來欲雨薄寒增黃花插帽經三宿
白苧裁衣試幾層小鳥飛翻簷外樹微風升降酒邊燈
相期偶值趨朝暇起問鼙鼙鼓未曾

同作時重陽後三日

潘耒

西峯鎮日翠峻增瀑直無因得共登九陌年華銀箭
水千秋心事玉壺冰惟因綠酒親元亮莫遣黃花笑

季鷹却憶升平多故事醉騎官馬簇紅燈

送查上舍昇之湖口

爾去彭湖口香爐對客牕潮痕灌嬰井果否應潯江

除日 保和殿侍宴

珮結緋魚後樽開白獸先呈能勾樂隊密坐潤爐煙紫
路頻除夕青燈異往年誰當頌椒會猶侍

聖人前

昭陽大淵獻

元日 賜宴太和門

垂衣逢盛際，輯玉盡來庭。
白醞三光酒，青歸一葉蓂。
新

年

恩較渥，昨日醉初醒。
九奏鈞天曲，風飄次第聽。

十三日 乾清宮 賜宴

詔許 宮門入人隨，
陛戟移江梅，低壓帽，火樹密交枝。
既醉盈觴酒，無疆萬壽詩。
夢游真不到，今夕奉恩私。

是夜 賜內紵表二裏一

元老傳

天語殊恩及侍臣禮優加束紡價重抵雙銀笑荅妻孥
問爭尋剪尺頻光風今歲早春服最宜人

十五日 保和殿侍食

露草詩歌雅雲天易象需不圖大酺樂獨許小臣俱注
盃茶膏滑堆盤菜甲殊歲除曾幾日四度飲 堯厨

是日再入 保和殿侍宴

乍 賜晨餐出仍容午宴陪一夫馳秉翟七校下傳杯

妙舞娑盤歌華鐘取次催分明衣上月攜自九霄回

二十日 召入南書房供奉

本作漁樵侶翻聯侍從臣迂疎人事減出入

主恩頻短袂紅塵少晴牕綠字勻願為溫室樹相映上
林春

恩賜 禁中騎馬

魚鑰千門啟龍樓一道通趨翔人不易行步馬偏工鞭
拂宮鴉影衣香苑柳風薄遊思賤日足繭萬山中

三十日

上自南苑回 賜所射兔

壹發歌文園三驅入漢郊乍肥淺草窟宜入早春庖
賜向燈前出歸從馬後捐食經繙未得方法試燔魚

二月初二日 賜居 禁垣

講直華光殿居移履道坊經營倚將作宛轉繞宮牆對
酒非無月攤書亦有牀承

恩還自哂報國祇文章

駕幸五臺山恭紀三首

圖經曾識五臺名想見雲從
帳殿生節物乍分春恰
半登臨最好雪初晴林香紫鴿翻風上月黑金蓮照地
明定有山靈呼萬歲不徒龍象下方迎

花宮高下繞臺懷鐵鑠層層鴈齒階代郡雲山連朔郡
北街星斗劃南街千夫試轉清涼石二月如燔秦岱紫
望秩百王曾不到天教

宸藻首磨崖

紫府仙居岳鎮同削成太古想神功地傳竺法蘭棲處
山入勾龍夾畫中曲磴溪流頻度馬晴雲鳥下數歸鴻
省方豈為尋沙界特采天花壽

兩宮

駕自五臺回 賜金蓮花

紫府蕃神草金花近

御牀獻非緣鹿女

恩許載牙箱一束叨

珠數千金補禁方
丁寧須什襲或恐夜生光

銀盤姑

細菌多無算銀盤大一圍
未殊榆肉脆更較樹雞肥
御墨題猶濕嘉蔬物豈微
流傳文館記盛事景龍稀
賜紵紀事

上闌初日映簾犀

天語聽傳紫閣西
織自珠宮加熨貼
擎來黃紙驗封題
折枝花訝臨風並
掉尾鯨看戲水齊
端綺入春

恩再洽稱詩彌媿在梁鶴

賜御衣帽恭紀

鶴紋初啟尚衣封藤帽朱絲自
九重日角乍辭宮樣

穩冰紈不散

御香濃玉堂掌故傳他日清鏡衰顏話舊蹤
回憶滄江
六年事筍皮荷葉釣船縫

醍醐飯

絕品醍醐飯人間總不知素餐臣節媿推食

主心慈九繫長腰米兼金六寸匙青精徒自滑較此駐
顏遲

賜鮓魚

京口鮓魚尺半肥黃梅小水平磯無煩越網千絲結
早見燕山一騎飛翠釜鳴薑纔 敕進玉河穿柳旋攜
歸鄉園縱與長干近四月吳船販尚稀

憎蠅

曉夢晨光裏羣飛戶尚扃慣能移白黑非止慕羶腥曲

兒思投筆輕巾屢拂屏北牕
眠未穩孤坐憶江亭

憎鼠

尺二田間鼠何來廣廈中
鬚看縛筆易聲比數錢工
未肯腸三易須知技五窮
銜蟬如可聘滅燭卧宵終

送杜少宰 臻 視海閩粵二首

漢將樓船遠受降重臣疆理到南邦
山程越嶺復見嶺水驛下瀧還上瀧
榕葉清陰交露輞梅花疎影入吟牕
不知五色羅浮雀玉節前頭日幾雙

暫輟山公啟事書周巡閩海自扶胥廿年已失魚鹽利
百戰猶存蕩析餘鴈戶沙邊尋舊宅鮫人渡口趁新墟
恩言却似平淮後相度來宣走傳車

早秋西華潭

殘暑秋逾熾涼風乍催微波蓮葉卷新雨豆花開宛
轉通橋影清冷傍水隈夕陽山更好金碧湧樓臺

夜起

銀浦懸宮月金風動井幹魚雲吹不去蚪箭滴初殘木

落南樓早山連北口寒秋來無別夢夜夜望回鑾

送宋僉事榮之官通潞四首

十里鶯花露輞前慶豐牖水得漁船莫嫌一出春明遠
猶是城東尺五天

中盤曾聽佛樓鐘按部重登紫蓋峯料得使君吟興發
塞門百道走紅龍

漁陽松繖寶坻魚漚酒吳船味不如更憶昔年移柳在
濃陰輸爾畫簾餘

白馬銀鞍紫絡纓引弓曾傍
屬車行為郎未老單車
出射虎重過右北平

次韻贈沈上舍

沈郎詩格珊瑚鈎曾題八詠之高樓著書應過習鑿齒
論事不數賈長頭橋門鼓篋又三載社酒治聾須幾秋
愛子齋居花滿眼踈簾清簟坐銷愁

題高侍讀江村圖二首

菊磴踈寮舊跡存畫圖髣髴見江村雙橋儘許通舟楫

他日柳陰來叩門

杜甫南鄰有朱老吾將徙宅問東家水邊沙際閒田闊
添種鴨桃千樹花

題畫羅漢

梅生小十六羅漢筆力遠勝盧楞伽我題此幅更奇絕
人影瘦於枯木查

題雪中垂釣圖

九十九淀畿南水五三六點塞北鴻雪花溟濛濕柳絮

人影瑟縮枯蓮蓬
易酒涑酒村壺白
東家西家爐火紅
此時堅坐不歸去
一笑無乃天隨翁

為王祭酒

士禎

題畫冊二首

澗山樂口水模糊
穉柳夭桃何處無
他日雪堂留客逕
不難疏鑿擬西湖

寒江窠石早梅舒
此地仙居也不如
但恐瀑泉侵案濕
小牕催徙讀殘書

法酒

敕自宮門下香從內庫來綠瓷雙甕滿黃紙一封開燈
火將除夜屠蘇最後杯沉吟

主恩重入手且先催

官羊

考牧傳周雅魚羔憶楚騷肥應速諸父瘦敢讓聯曹家

祭占丁巳毛牀鉸圈牢賜生臣必畜詎忍授屠刀

少牢
饋食

禮日用丁巳齊民要術養羊法三月毛牀動
則鉸之五月毛牀將落鉸取之八月又鉸之

鹿尾

東丹王子畫移刺楚材詩鹿尾漿始見楚材集尻截漿尤美肴蒸
味最竒須停射工脯不數果園狸燒尾聞唐日今朝宴
亦宜

梭魚

雉兔關東最梭魚味更良刺方青鯽少鱠比玉鱸香

賜出春初早攜歸尺半長罌師題字在

魚鱗有字識獲時係十月十日

寧分小臣嘗

除日侍宴 乾清宮夜歸賦

千門除日已春融
兩度椒盤侍禁中
坐聽鈞天仙樂
後起看珠斗上闌
東歸鞍笑逐三駿
馬守歲歡迎五尺
童不是雲漿浮鑿
落衰顏那傍燭花
紅

曝書亭集卷十一

欽定四庫全書

曝書亭集卷十二

翰林院檢討朱彝尊撰

古今詩 十一

關逢困敦

元日 南書房宴歸

上復以肴果二席 賜及家人恭紀

纔承 曲讌侍仙闈又撒瓊筵到北扉歲酒更番移席勸

主恩一念感心微比鄰漏下驚窺戶兒女燈前笑攬衣
閒向金坡說遺事全家賜食古來稀

自 禁垣徙居宣武門外

詔許攜家具書難定客蹤誰憐春夢斷猶聽隔城鐘

送張先生巡撫山東二首

十二山河大小東中丞持節鎮繁雄循良久數張京兆
副相依然漢上公井稅蠲來青帝壤 屬車迎及素王
宮雝花秋色看逾好秀澤單椒儼畫中

泰雲堂上酒曾酣種竹開亭徑舊諳山湧高城雙戟外
池分新水七橋南要知政簡無留牘可許朋來賦盍簪

準擬春風陪杖屨重遊細酌澆泉甘

澆泉子客濟南時所鑿

同黃虞稷周在浚彭桂飲劉學正中柱齋

國子先生屋數椽晴牕齊拓衍波牋詩題史籀岐陽鼓
書載汎光湖水船百罰深杯初度夜十年舊雨一燈前
不嫌卧甕人來數日日牀頭釀酒錢

副相徐公庭中種蕉結實禹鴻臚為作圖因題

絕句三首

已愛清陰護綠紗更看秋蕊綻靈芽
豐宜門外園官老
能得幾人逢此花

日南曾記一叢叢合薦冰盤荔子紅
誰料塵沙燕市滿
露珠涼綴小亭中

十年青簡待封題官燭長分太乙藜
正值閒庭花放日

便應焚橐

禁園西

故事國史編成於
西苑蕉園焚橐

題汪替善霏讀書秋樹根圖

千官仗下列蛾眉東馬巖徐獻賦時安得斯人坐雲壑
披圖真笑虎頭癡

同陸處士查上舍兄弟寓齋小集分韻得逢字
金水橋南楊柳西華潭外芙蓉衰年杯興未減隔歲詞
人又逢爾汝何甥謝舅飛揚季虎頭龍夕曛戀客未落
留聽西林暮鐘

送益都馮先生集萬柳堂次韻二首

十里沙堤萬樹楊秋容猶未點新霜小車稷下將歸日

上巳城東舊醉鄉，坐立部歌聽總好。田園樂事話方長，
千秋祖帳羸疏傳錄別樽前。和有章

白頭許 賜治源閒青史，難將諫錄刪。此去耕漁尋舊
侶，且憑絲竹解離顏。開簾浴鳥階前水，過雨斜陽檻外
山。他日從游期莫定，強留嘶騎玉河灣。

送張遠之桂林二首

濯枝新雨玉河隄，送客遙尋五筦西。自是駉鸞逐仙侶，
緇塵不上錦障泥。

星郵南指伏波巖路轉衡山九面帆吟到相思江更好
綠榕樹底紮蕉衫

題王叔楚墨竹為家上舍戴宸賦

畫家畫竹專用墨李波文同已難得後來能事吳仲圭
橫斜曲直無端倪誰為此圖王叔楚意象豈必全師古
竹枝大者一尺強其餘瑣細抽風篁山泉泠泠走石罅
可惜無人坐銷夏潛江主人購得之索我點筆題新詩
吾家長水一茅屋北垞南垞都是竹每憶園林燒筍時

不戀樹雞及榆肉海陵曹岳為我畫作圖藥爐茗椀書
籤廚年來松菊成榛蕪對此臨風一惆悵歸與歸與范

蠡湖

送馮遵祖宰平陸

著書獨有五亭好作吏無如三晉閒醉裏襄陵官甕酒
到來底柱郭門山耕餘讓畔田千頃吟對浮查水一灣
白鴈年年度汾曲相思烟月幾彎環

送周叅軍在浚之官太原

曩客晉陽城逢君館香界羣公方愛士列席邀旅詰君
時一逢掖血氣自矜邁高坐噉蔬肩勇若舞陽噲百壺
恣傾倒寸心無薑介此會二十年平生意所快川涂屢
漂泊第宅改湫隘謀生術愈疎汲古心匪懈詩圖審正
變樂章別流派博稽皇象碑耽讀向平卦以茲河漢才
金門足遷拜一官趨幕府諾仕吁可怪衣垢馬足塵氣
短酒壚債所幸山水區轍跡舊曾屆瑋琮難老泉分流
注蒲稗中有長生蘋葱青儼圖畫峪藏千佛經遺跡久

未壞吾初見之喜力欲挾幽砦徙置叔虞祠琳瑯等金

甌事惟慮始難謀以蓄疑敗

風峪洞中有北齊天保時刻佛經石柱一百二十六予

客太原謀于王方伯顯祚曹副使溶將啟而徙於晉祠築亭貯之有方使君持不可乃止好奇君過

我試往破天械築亭古柏交移石秋陽曬廣榻九萬牋
流轉都市賣即事良可傳居卑莫深喟行春孤突山翫
月鮑昭解適意亦由人慎勿形神瘵

送田少叅雯之楚分韻得江字

前年白下君送我臨當解纜拔柳椿勞勞亭子惜分袂

津吏伐鼓聲逢逢今年燕市我送君
西山積雪連崆峒夕陽欲落猶未落
返景倒射紅油牕人生會難別苦易
君又乘傳熊渠邦川涂迢遞四千里
計程涉濟河淮江

翻飛蒼鴈且莫致攬環結珮何時
雙深杯當前宜縱飲

滿貯獸火傾羊羶坐中曹

貞吉謝重輝

鬪竒句掉險類

舞都盧撞壁言諸宮商迭相奏
琴瑟控楫紛瑋擬君亦錄
別留新詩偏師一出長城降
古來文人志開濟豈必翰
墨驚冥恣邇者七澤罷兵革
燒畬買犢齊耕稜芻麥米

粟待輸輓宮籩稔耗爭牽扛有時清暇集參佐赤闌湖
口浮舴舨雄風颯然蘋末至怒濤直指臺根撞武昌魚
汧十千尾宜城酒醞二百缸維藩樹屏昔所重快意不
在張牙幢吾今謫官一無事思從楚客寒蘭泣題襟漢
上許酬和他日抽帆偃畫杠

送曹郡丞貞吉之官徽州

勝絕新安郡高秋擁傳行江流清見底山色翠當楹萬
壑雲為海三都石作城漆林分井社松蓋辨陰晴墨愛

麋丸清茶先穀雨烹由來風土美見說訟庭清之子齊東
彥才華鄴下并詞源白石叟詩法玉谿生鳳詔趨晨久
鸞臺典籍榮後來新愈積老去驥長鳴豈厭承明出遙
思廢吏迎名山謝康樂隱吏許宣平晚飯桃花米春廚
竹筍萌麥光題素紙龍尾滌金坑暇有懷人作知同惜
別情十年呼薊酒雙調譜秦箏忽漫登長道沉吟數去
程跡猶淹旅食心已定歸耕七里嚴陵瀨千秋黜帥營
相尋試酬和編筏采紅蘅

贈別孟楷二首

老夫卧穩謝浮名，羅雀閒門少送迎。
一事近來差快意，篋中詩得孟雲卿。

碧山學士王聖與鑑曲詩人陸務觀五百清詞纔過眼，
最愁花外送歸鞍。

詠柿

累累八稜柿，託根西山陽。
一株一畝陰，蟲鳥莫敢藏。
烏稗秋迸實，赤葉新翻霜。
團酥釀甘露，冰齒流寒漿。
回憶

三伏時毒熱難周防永日無片雲焦烟起連岡行人經
樹底豈異冰壑涼此時儻結子瓜果安足方奈何風淒
其摘來始盈筐嗟爾生非時難誇受命強况值蟹膏肥
配爾慮見殃憧憧往來人掉臂不一嘗空煩黃口兒燈
火市道傍南鄰煨芋粟北舍鳴椒薑炎涼迭相代歛退
分所當幸有林居人愛之終勿忘

題東浦學耕圖二首

上書空敝黑貂歸賣賦年來計漸非爭似為農東浦畔

醉吟獨速舞蓑衣

老我青緇嬾束腰薄田枕水傍灣橋明年準擬全家返
也買烏犍種楚苗

題汪檢討楫乘風破浪圖

汪君才地何崢嶸直與東馬嚴徐并一朝銜

命使絕域瀕行封事上九閔乞降

御筆示海外永使荒服輸其誠僉曰不可

帝曰可濃墨大字搖光晶

天子臨軒賜顏色容臺諫院那得爭琅函錦題國門出
車前駟唱揚三旌麒麟之袍繡織成青絲絡馬雙擎纓
被以重罽紅猩猩南浮江淮達閩越長風五月沙雨晴
天妃廟前釀酒行柁樓語笑潮已生梅花洋東天水黑
但見日月星辰明一夫危檣赤脚撐棹如山木騰鼉鼉
百夫仰望目盡瞠峭帆風飽弓在檠又如張翼鷲鳥征
有時吟嘯訝竝笙千人同舟一心力不比吳越交相傾
巨魚長似金背鯨揚鬚前導莫敢櫻滿空霜禽飛且鳴

黃衣蝶翅方鸚鵡，昏波忽拔虎蛟穴。靜夜或睽驪龍睛，
潮雞報曉鼉報更。三日竟指中山城，中山君長搓手迎。
道旁張樂聲琤琤，傾城士女堵牆立。筍皮笠重蕉衫輕，
叢筠夾岸烟梢平。佛桑花開白紫頰，日長使館坐無事。
圍碁隔院聞楸枰，銀光研紙百幅呈。詩篇或與沙門賡，
愛君臨池用筆精。草書不減張伯英，八分遠過梁昇卿。
宣尼新宮碑一丈，高文摹勒傍兩楹。更聞島中田少耕，
賓筵日日羅香杭。佳酥之魚翠釜烹，香螺勸酒黏綠觴。

模糊深枕山諧羨遐甌風土正不惡亦有花藥同揚荆
歸艤仍以針計程往還七見蟾蜍盈君來詣 闕因陳
情請假讀禮旋書棚却金復荷

主恩賜投牒翻來遷秩榮憶昨送君秋氣清纔逾一暑
入

帝京金門咫尺我顛蹶君乃萬里來蓬瀛披圖雪浪看
尚驚眼花欲眩心怦怦耳中髣髴波濤聲粉精墨妙誰
經營恍疑博望星槎橫我歌長句揮散卓青雲敢附千

秋名

題侯開國鳳阿山房圖三首

四先生里讀書莊，莊，鎮也。經營興不忘。張筆孫詩陸經義，

孰居南北孰中央。

謂張上舍雲章、孫孝廉致彌、陸徵君元輔。

吾家亦有三畝宅，千个筍簞兩樹桐。輸與勾吳歸客健，

滿頭白髮帝城中。

練江風物最牽懷，藥布筠筒市滿街。他日堂成須報我，

便拖竹杖覓吳鞵。

沈上舍季友南還詩以送之

有客辭我行，席帽白羅袷。自言不得意，歸當荷松鉬。小
園柘湖潛，流水似清雲。離黃舞花梢，靜綠照簾栢。青蒼
風筠竿，紫茵露藥甲。都籃茶具列，月波酒槽壓。恒許二
仲尋，寧嫌三徑狹。年豐鰕蜆賤，市遠漁樵洽。擢歌夜尚
聞，香稻曉仍畝。暇便操土風，先民有遺劄。上舍輯
搗李詩樂郊
續私語雅製，洵不乏憶。昨擔簦來燕臺，雪飛恰高詠。篋
中詩得句奇，且法燈火攤。上元酒人齊，賞狎陽春詼。寡

和轟飲恣深呷雅材一百五珠槃藉爾敵駢詞妙徐庾
經義析鄒夾謂當搏扶搖青雲在俄霎豈意威鳳姿先
鳴讓鸚鵡新霜危葉墮遠渚羈鴻唳別筵逾九日寒水
響五牖竹節鞭乍持萸房鬢猶插倦游憐歸人有若劍
離匣改歲誓言旋比隣數鷺鴨

和韻題惠周惕紅豆書莊圖五首

離離紅豆映空亭裊裊牽牛上短屏最愛舍南風幔卷
高城不隔遠山青

粥魚茶板近松門夕照雙浮塔影存一入畫圖看便好
城居僻似沈尤村

全家擬泛酒城東已分生涯釣叟同他日招邀對田北
一帆風飽似張弓

羣雅之材一百五說詩匡鼎未應過老夫也擬刪箋注
點墨研朱奈嬾何

吳船歸及早梅春淨洗東華袵褐塵我亦潞沙旋放溜
來尋北郭十詩人

嘉禾篇頌張先生

康熙二十三年冬

天子將登日觀峰十行 詔下軫三農薄徭放稅寬租

庸南徐夫子小隊從天廡 賜馬繡纏髮先時水旱頻

告凶北達河沖東漰灘晨炊不舉夜不春夫子下車憂

懣懣請發倉粟救鞠訕鄉師為粥吏佐饗飢者得食皆

歡悰有如鴈唼魚噉喁土鼓賽社聲鼗鼗服田力穡不

敢慵甞麥既登種稂種冷風時至甘雨濃生我嘉穀黑

白彤一莖乃見抽三稭露苗珠綴花惺忪照以澹月涼
溶溶下有溝水鳴琤淙耕夫饁婦齊動容襁負稚子行
蠻蠻百年野老訝未逢載筐及筐已以驚來告節使獻
九重般般者獸宛宛龍連理之木蟠枝松玉芝紫脫青
芙蓉未若茲禾和氣鍾靈苗驛驛芒茸茸八月其獲崇
如墉輸之天庾惟正供我聞樂事舒心自大賢美政
孰比蹤不貪為寶民吏宗

主聖臣良時乃雍五風十雨殊乾封

簡宋觀察華

今年燕臺數雨雪雪晴九陌吹回風欲鳴不鳴曷旦鳥
得過且過寒號蟲茸表已敝庫尚典濁酒苦貴樽長空
故人念我儻分贈薊門白炭盤山松

題陳

履端詞豪

尺書頻寄慰衰遲
袞履風流又一時
珠玉連篇歌乍闋
么絃別譜小山詞

題洪生對酒圖

酒庫京坊六度開近無月奉市官酷荆高舊侶多零落
賴爾南鄰日往來

再題高學士江村圖二首

荒茅結屋短牆垣不似金坡學士園只合年年借儂住
漁竿漁網插溪門

勾吳嚴四畫難得比似菰村境復殊想像江鄉宜有此
蛤蜊菰葉賀家湖

為畢大生題扇

今年十月尚暄和雨後流泉響玉河竹扇未應收畫篋
絮衣猶可著香羅籬根細菊冬逾媚砌下吟蟲夜轉多
邨得滄洲載新酒亭前捉卧甕人過

雨過劉學正兼隱齋觀石鼓文拓本

今秋最多雨

陸嘉淑

味谷藏烏蟾

彝尊

枉書丙丁帖

魏坤

果符甲子占

劉中柱

夙興愁霞頰

朱載震

餘溜消突黔

查慎行

折簡四門至

嘉淑

卜畫得所快

彝尊

各各衝塗泥

坤

紛污鞞襜

中柱

入門老莎滑載震

遶屋

細菊黏慎行

焜

黃已撼撼嘉淑晚翠方娑娑彞尊濕徑乍一取坤油雲

俄重淹中柱側耳聽淅瀝載震深坐防濡霑慎行際此

霾雲并嘉淑猶未霰雪兼彞尊臘釀清五加坤獸火紅

半欵中柱安肅菜翦甲載震直沽蟹撐箝慎行海物羅

瑣碎嘉淑山果咀酸甜彞尊捉卧甕人醉坤覬不速客

添中柱中筵樂方畢載震主人發經奩慎行獵碣自陳

倉嘉淑甲乙分排籤彞尊其辭儷雅頌坤其法妙鈎鈔

中柱選徒悉左右載震體物窮游潛慎行秀弓既云調

嘉淑 麋不罔不殲 彞尊 君子爰道樂坤 邁豆充魚 燁中

柱 詩疑吉甫作 載震 書命臣 揣僉 慎行 車攻與吉日 嘉

淑 比擬意 文厭 彞尊 奈何馬鄭徒 坤 紛綸起 談論 中柱

年殊成 宣狩 載震 譜異 姬嬴 鉞慎行 缺畫費 伊嚶 嘉淑

密義 煩顧 瞻 彞尊 修藤 蔓 穆 朶 坤 勁 草 萌 勾 尖 中柱 簪

花女 姚冶 載震 帶甲士 凝嚴 慎行 作龍之 而鱗 嘉淑 撇

攬于 思導 彞尊 往在 岐陽 時 坤 曠野 孰 窺 覘 中柱 受 辛

相夜 杵 載震 敲火 磨霜 鎌 慎行 宣和 忽移 致 嘉淑 皇慶

乃覆苦彙尊切磋留太學坤愛惜蓋深檐中柱鈎金縱

剗別載震節角仍安恬慎行詛楚文久泐嘉淑亡秦碑

或燿彙尊藉茲典刑存坤一字直一縑中柱述書誦古

賦載震改席褰疎簾慎行車輶投亦得嘉淑接離倒美

嫌彙尊吏暇笑兼隱坤官冷慵趨炎中柱有酒傾玉餅

載震無酒指青帘慎行六街鼓鼙鼙嘉淑兩頭月織織

彙尊欲行復被肘坤燭至還提槩中柱謂客毋庸歸載

震險韻尚可拈慎行

旃蒙赤奮若

秋涇行示吳秀才周瑾

秋涇水上有落帆短亭子渡頭橫跨百尺橋蟹舍漁村
合成市吳郎門對涇水流花南有堂北有樓吾來襍被
過信宿三日五日常淹留汧魚倒臘甕量酒傾新篇君
詩老蒼賦溫麗有才如此翻不第蘆簾紙閣歷歲年穉
子蓬頭婦椎髻婦為吾妹子吾甥薄田涇上鹿可耕埽
除肯作一室計汗漫寧為千里行相憐童穉情親早旅

食京華吾潦倒昨者有客來武陽傳說容顏君不老人
生六十猶未衰樽前只合開懷抱何況騷人屆初度燈
火上元時最好歌長歌書草書知君發函伸紙還軒渠
吾今妻子返里閭明年歸乘轂鯨車君還秋涇定何日
相期近結比鄰居

送王贊善

揆視浙江學政二十韻

京國沙隄舊叟江甲第臨世家唐宰相經術漢儒林早
射匡時策先鳴正始音才華王轅謝詩筆沈兼任偶出

辭溫樹重來翫薛禽瑤山開四照丹地拔千尋 朶殿

新篆管 諸端每獻箴詢謀公望最眷顧

主恩深持節巡江介觀風采會吟色絲能辨石爨火定

收琴洞壑已三九

道書洞天福地在浙江共二十有七

圖書足古今湖光

仙擢疊嵐翠戟門侵紫筍茶教淪烏巾酒待斟詞場輸

藻鏡交誼重苔岑十載逢青眼相於愜素心別筵愁袞

袞嘶騎去駸駸苑雪花猶積官橋柳未陰懷歸貪倚着

投分忘升沉送送情何極勞勞思不禁還期承蓋處鄉

曲共題襟

社日二首

幾日社公雨芹泥香滿汀生憎飛燕至不放海東青

海東

青畏燕子見歐陽原功詞

藥甲何曾碧花枝亦未紅治蠶有方法只恨酒錢空

柳巷杏花歌同嚴中允

繩孫

錢編修中諧作

頻年住帝里一山一水何曾經有若蝸負殼又若鳥
翦翎疾風揚沙卷花去眼看春事如流星邇來罷官居

肆意尋郊坵朝從潞河還犯卯酒未醒晨過宋使君
華留飲漫堂雙

橋東偏柳巷北小寒食後微雨零偕行者二子各各駐

輿丁杏梢含苞猶未白柳條踈地今漸青晴絲冉冉香

細細卑枝孃孃高亭亭村童灌畦愛看客轆轤并架雙

銅餅種花此地已難得那不更縛香茅亭江鄉爾時春

愈好西神山下泉泠泠閭門游人連臂出筠車十里填

支硎只如南湖亦不惡桑鳩穀犬聲可聽紫荷花草雜

坐卧燕來竹筍生鈴竈人生還家貧亦足何苦晨夕勞

其形吾儕田廬况不遠峭帆柔櫓凌迴汀都籃兼攜茶
酒具悶拓小眼紅牕櫺吳歛越吟相繼和五日十日恣
留停念此令人反惆悵夕陽四顧愁冥冥

寄胡少參介祉

使君麗句過西崑賦格詩圖許細論轉粟年年先社燕
抽帆處處市河脉吟看上客題襟滿書想高齋插架存
孤負連船載滄酒故人未得下津門

送陳舍人 大章 歸黃岡

君姿玉山並君詩白雪高豈意采風人力不及楚騷策
馬去京國却佩腰間刀深雍虎文韉短後茶色袍但愁
別須火何用心鬱陶素業在黃岡潮田滿江臯烏捷三
百尾種秫持作醪暇搜耆舊文筆秃猩猩毛少年能著
書此事亦足豪何時涉夏澳共爾浮金舸

贈耿都尉二首

承 恩驂乘入明光 賜第仍居履道坊日昃尚趨
三殿直月正恒捧

萬年觴長楸走馬先歸垆小苑飛花近拂牆自有囊中
餐玉訣無煩菊水餉南陽

萸房竹葉勸深杯月底簫聲次第催才子不妨如意舞
酒徒拚倒接羅迴開簾最愛亭前瀑改席宜登樹杪臺

笑問琴山一青鶴可能天際忽飛來

謂周郎中
襄緒也

納臘侍衛性德輓詩六首

驟聽黃雞唱驚隨白馬來百年嗟輟瑟五日尚銜杯泉
下知安往人間信可哀退朝憐相國封篋忍重開

通籍題纒筆承 恩改鵑冠射鳥天一笑走馬路千盤
禁直昏鐘入廊餐午箭殘傷心倚閭望東第少歸鞍

出塞同都護論功過貳師華堂屬纊日絕域受降時悽
惻傳 天語艱難定月氏斂寇猶未散消息九京知

屈指論交地星終十二年斯人不可作知己更誰憐翠
漸深門柳紅仍膩渚蓮舊游存並少悽斷小亭前

主客披圖得雲烟過眼諳吟花成絕筆聽雨罷深潭畫
裏韶顏在樽前綺語耽憑將腸斷句流轉到江南

別悔從前易途傷此日窮迴腸歌哭外搔首寂寥中迹
埽孤生竹枝催半死桐自今觀物化不詆釋門空

送姚先生巡撫全蜀二首

漢庭折檻舊知名節使疇咨副相行曲讌午辭珠鏡殿
單車春莅錦官城山川想像王師入父老扶攜益部
迎井絡坤維資重鎮遙將籌策贊昇平

清時文軌萬方同將作經營五柞宮雅雨黎風吟木客
芋田芸鼓輟巴童亟須元老經綸及不使遐陬杼軸空

天眷自來西顧切昌言早為達
宸聰

高處士兆方處士中德陳上舍治將歸過集古

藤書屋同陸處士嘉淑魏上舍坤分韻賦長歌

送別得要字

我攜家具海波寺九月未槁青藤苗夕陽倒影射檉柳
此時孤坐不自聊故人遠別齊過我謂言分手當來朝
或還東江陸瑁宅或渡南浦江淹橋龍眠一叟幡然回
斧柯無恙中山樵金臺酒伴難悉數隨意牽拂相招要

林衣滿地席帽脫畫不絕筆書能起吳船恰到麴車響
甕頭乍圻輕塵搖宛樽屢空鴈壺覆豈必紫汝官哥窻
南中風物試細論歸值稻米蒸長腰披綿黃雀切玉鱠
差勝北地肥羊燒我今已解腰下組羸馬且免晨趨朝
夜如何其判促膝秋牕須盡燭一條人生合併苦不易
後會久速誰能料明年吾亦掉頭去石田茅屋姿逍遙
儻能訪我長水曲相留浮白還炊彫

重九後一日雨中集長椿寺

九日倏已過

姜宸英

濕雲漫四郊森森長雨垂
彝尊颯颯

虛檐捎病葉戀冷枝

梁佩蘭

驚烏盤空巢晨興踐夙約
陸嘉

淑

攬袂皆貧交勝引雙樹林

魏坤

宛若深山坳藤綰三

秋蛇

張雲章

槐舞千歲蛟赭柿迸露實

朱載震

金英坼霜芭

紅的的吳萸

陳曾發

碧叢叢秦瓦瓦溝窟鼉鼉

湯右曾

戶網

除蟪蛄蘚深聳肩伏

查慎行

篆古蒲牢哮粥魚晝浩浩
俞北

曾牆雞午啾啾光景欸明晦

宸英

眺覽窮櫓櫟新耐綠

滿竿

彝尊

晚松黃充庖豈意青豆房

佩蘭

俄頃羅嘉肴

鳴蘆騰紫蟹

嘉淑

題鮫餘彩貓子戲新韭配坤鮮鯽枯

荷包已見堆膏登雲章况有兔首魚分曹玉鈎射載震

角力般盤拋急觴易沈頓曾藪緩帶便爬抓一飲動一

石右曾載號或載吹同聲唱者和慎行含意漆在膠五

言乍妥帖兆曾十手爭傳鈔雖乏韶護音宸英肯使下

里殺合并洵匪易彝尊顧我中心悵歸帆艤舫佩蘭

別騎籠鞞鞞灑迤陟荒岡嘉淑邪許拳長筴免泣卞和

璞坤且誅宋玉茅草縛不借履雲章泉酌喙然匏檳榔

蕉椰荔

載震

都蔗菱菰菱雞頭祖竹萌曾蕤翠羽官梅

梢熟知江鄉樂

右曾

莫厭潮田曉招隱邱中琴慎行勵

志貴上艾豈必馬足塵兆曾逐營斗筲宸英

送梁孝廉佩蘭還南海

合昏花開暑雨微故人留君解驂騑謂納臘侍衛性德也合昏花

謝故人死燕市酒徒看漸稀秋林卷籜百卉腓籬根細

菊圓如璣北風蕭蕭南鴈飛蟄蟲窮鳥相因依此時欲

別不忍別馬行蹉跎循郊圻把杯勸君君莫揮執手語

君君莫違男兒貧賤亦常事故鄉得歸姑且歸吾今捐
珮也當去免使同學翻攢譏遠遊汗漫計亦得他年訪
爾白板扉舊交雖少况無恙相與散策探林霏盡脫
苛禮消塵機龍瀧下上濯我足石樓小大振我衣乳蕉
子黃荔子緋馬甲柱脆紅螺肥榕陰一畝竹十圍南園
可以恣酬和詩卷無人論是非

古藤書屋再餞梁孝廉

露穉倦未飄雲鴻遠相引
曩尊星埃感蓬勃物候變淒

緊

湯右曾

怪怪八達衢有客駕修軫

查慎行

僕夫在郊垆徐

黍被隰

梁佩蘭

柅車浮淪瀾舍擢度嶮嶙

彝尊

雷殷風

息颶海大魚見驚

右曾

峽援有時歸南雪終不賈

慎行

九十月之交六千里而近

佩蘭

懷居興雖洽判袂情詎

忍

彝尊

置酒青藤陰入門走蛇蚓

右曾

颶颶涼颶動灑

灑纖月隱慎行

山杯深窪苑野蕪脆嚼菌

佩蘭

迎寒茄

卷葉戒夜鼓鳴篔

彝尊

譚鋒推趨雄詩械破詰窘

右曾

毫毛秋兔脫墨光古香吮慎行
臨當黯然別且復莞爾

晒佩蘭

炎瘴舊所便眠食勗惟謹

彝尊

行逢早梅墊到

及蟄蟲蠢

右曾

前期久莫忘鄉夢今始準

慎行

穆如清

風篇袖以示恭尹

佩蘭

寄周參軍

在浚

初聞歇馬臺駘廟近說看花狐突山愛客易傾冬醞美
著書難得畫簾閒加餐道遠彌相憶倦旅秋深尚未還
風峪石經無恙否何時徙置別苔斑

喜周篔簹至

者舊西吳大雅材白頭纔一到金臺最愁馬上乘船似
不道天邊犯雪來酒盞四年方得共燭花昨夜記曾開
郊扉晚計何時遂十里及山日往迴

曹先生洛輓詩六十四韻

徇祿經時別加餐萬里教報書人未返凶問客來讜竟
輟倚桐瑟虛藏稷黍苞腸迴真似結語咽不禁倩投分懷
衿契忘年比漆膠縱橫才不世經緯學能包壯日膺

乾顧亨衢協泰交皇華在原隰驄馬避鞭鞘卿月青霄

上台星散極梢

主恩中外重物議愛憎散嶺外資分轄雲中藉建饒軍
興還轉餉戰勝屢登輶未覩勳書策翻令祝代庖清時
卧安石竒計老居鄴種樹鄰初地為園傍樂郊金陀坊
最曲錦帶水難消曲解偷聲譜扉從問字敲說詩窮五
際布易得三爻東馬文無敵南狐史共鈔近游師束皙
高論折尸佼昔歲投荒徼芳筵恣叫呶晴窗蟲蠟翦晚
飯鷓鴣魚飲罷題連軸譚深坐轉脍硯憐鸚鵡潤筆肯

蚶蚶拋小市船撐蜃輕衣杼織鮫荔支團火繖蘭茁挂
風髻蝶翅仙袞曳柑香佛手抓潮來雞喔喔日出烏咬
咬震瓦長鳴颺奔雷易激颺離愁珠海濶歸計石田磽
魚最憐鴛鴦泉常激虎跑避兵居共井獲稻澤分櫟舫
為蓴絲泊厨看芡實鮑間尋百法寺悶解五湖笑楓岸
拈紅葉茶槍試綠筍探梅熨斗柄射鴨竹弓弮纜繫蘇
堤遠壚逢卓女姣過頭齊杖栗婁尾數浮陀山後津仍
連樽前意更收池清移塞柳花翠繞秦光擁被陶為穴

炊梁釜爨籍白榆貪食耳黃鼠厭克肴糖躁三沽蟹糕
黏九日貓渾河流苦急磧石面多巖獵騎掀茸帽笋人
疊舞稍停軒聽賽鼓並轡指飛牆畫壁重重拭苔碑處
處籊迎寒吹箴策欲雪卷旂猶我去重游薊公歸亦渡
汶往來頻聚散契濶少謹誥小草無端出冥鴻忽見窠
盡嫌中散癖難免北山嘲反教孫升木那容鵲定巢身
猶依 鳳闕官久罷 螭坳闕寂門羅雀淹留迹繫匏
正思耕作偶何意影同汜磨滅頻年札淒涼一束芟賦

成栖舍鵬夢斷入懷蛟遺草知盈篋懸車定覆罨空牀吟
蟋蟀暗牖網蠨蛸籤帙無由借人琴自此捋茫茫千古
恨惻惻寸心忸愧後兼金賻惟將清酒酸平生知己淚
亟欲反衡茅

送曾燦之南海

白髮遊燕舊酒人梭鞢重踏六街塵來辜鄧尉尋山約
到及長安卧雪旬鴈底雲帆鄉樹繞馬頭星驛嶺梅春
南園詞客多無恙暇日爭扶大雅輪

徐公元文小像二首

緇塵十丈輦東華
快馬明駝轂鯨車
誰似先生銷夏處
水亭風幔俯雲沙

一編青竹萬蟬魚
東馬南狐總不如
官燭兩條人半臂
笑他紅杏宋尚書



曝書亭集卷十二